

Eqqakkat plastikkiusut atoqqinneqarsinnaanngornissaannik, sanaartornikkullu atorineqarsinnaanngortinnissaannik periarfissat suunersut pillugu Naalakkersuisut UKA2022-mut agguaaassassamik nassuiaasioqqullugit Inatsisartut aalajangiiffigisassaattut siunnersuut. Nassuiaammi pisortat namminersortullu suleqatigiissutigisinnaasaat, aningaasartuutaasinnaasut, inatsisitigut suut allannguutaasariaqarnersut, allatigullu tapeeriaatsikkut periarfissiisinnaanissaq minguinnersumut ikaarsaariarnissamullu iliuusissat qulaajarneqassapput, kiisalu immikkoortiterinermut atortorissaarutit allallu sanaartugassaasariaqarnersut ilanngunneqassapput.

(Inatsisartuni ilaasorta q Aqqalu C. Jerimiassen, Atassut)

Akissuteqaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siullermeerneqarnera

Inatsisartut aalajangiiffigisassaattut siunnersuut, Inatsisartuni Ilaasortap Aqqalu C. Jerimiassenip, Atassut, saqqummiussaa pillugu Naalakkersuisuniit qujavugut.

Eqqagassalerineq, tassungalu atueqqissinnaanermut periarfissat ilanngullugit, aallutassatut pingaaruteqarnerannut siunnersuuteqartoq Naalakkersuisut isumaqatigaat. Plastikkit atortuupput assigiinngitsorpasuarnik pitsaaquteqarlutik iluaqutaasut atoruminartullu, kisiannili pinngortitamut iginneqarsimatillutik inunnut, uumasunut avatangiisinullu ajornartorsiortitsisartut. Taamaattumik isumatusaartumik plastikkit atorineqartussaapput aammalu avatangiisit eqqarsaatigalugit eqqortumik iginneqartussaallutik. Naalakkersuisut eqqagassalerinermut pilersaarutaanni eqqortumik eqqagassalerinissaq, avatangiisinut peqqissutsimullu isumannaatsumik ingerlatsinissaq, aammalu eqqakkanik, soorlu atoqqiinnikkut imaluunniit ikuallannerisigut kissamik pilersitap iluaqutigineragut pitsaanerpaamik atorluanaanissaq pingaarnertut siunertarineqarpoq.

Naalakkersuisut plastikkinut tunngasut aalluppaat. Tassunga atatillugu plastikkinik atuinernik annikillisaanarlutik aammalu eqqakkanik plastikkinik isumaginnittarnerup pitsanngorsarneqarnissaa qulakkeerumallugu iliuusissatut pilersaarummik naammassinneqqammerlutik.

Iliuusissatut pilersaarut “Pinngortitami plastikkit annikinnerusut” tamanut ammasumik saqqummiunneqarpoq, Inatsisartunilu ilaasortanut agguanneqarluni. Pilersaarutip imarivai plastikkit ajornartorsiutaanerinut suliniutissat aalajangersimasut. Iliuusissanut pilersaarutip agguanneqarnera soorunami naammangilaq – iliuusissanummi pilersaarummi saqqummiunneqartut piviusunngortinnissaat qulakkiissallugit pingaaruteqarpoq – suliassallu suleqatigiiffiginissaat qilanaarivarput. Naalakkersuisut nassuiaat, cigaritsit kimmivikuisa pinngortitamut pinnginnissaannik immikkut aallussiviusoq aammalu aalisarnermi, piniarnermi aallaaniarnermilu atortunut qimaannakkat iliuusissanut pilersaaruteqarfiusoq aamma suliareqqammerpaat, agguateqqammerlugulu. Cigaritsit kimmivikui aalisarnermullu atortut qimaannakkat plastikkinik akoqarput, taamaattumillu pilersaarutit taakku aamma plastikkit pinngortitamut igiinnarneqartanninnissaannut suliniutini pingaarutilittut inissisimapput.

Plastikkitt igiinnarneqartussaagaluit siunertaqarfiusunut allanut, soorlu sanaartornermut atortunut silamiluunniit issiavinnut atoqqitassanngortinneqartarnissaat pitsaanerussasoq pillugu siunnersuuteqartoq Naalakkersuisut isumaqatigaat. Plastikkinulli tunngatillugu aporfiusinnaasut ilagaat plastikkitt tamarmik immikkut assigiinngitsunik akoqarlutik sananeqartarmata atoqqiinnissanilu imminnut akuuinnagassaasinnaassaratik. Tassalu plastikkinik atueqqittoqassappat annertuumik immikkoortiterisoqartariaqarpoq, taamaattumillu plastikkitt assigiit aatsaat amerlagaangata plastikkinik atueqqinnissaq periarfissagissaarfiussalluni. Plastikkinik igitanik atueqqiisinnaaneq periarfissaatinnagu, plastikkitt igitat ikuallannerisigut kissarneq pilersinneqartartup atorluarneqarnissaa qulakkeerniarlugu Naalakkersuisut aallussissapput. Nuna tamakkerlugu eqqakkanik ikuallaaviit pilersinneqareeripata tamanna atorluarneqalersussaavoq.

Kommunit ilaat Avatangiisinut Aningaasaateqarfimmit tapiiffiqineqarlutik plastikkinik atueqqinnermik misileraanernik ingerlatsipput. 2018-mi aalisakkanut qassutit, qalut ningittakkallu 32 tonsit immikkoortiterneqarput salinneqarlutillu. Taakku plastikkiliorfinit plastikkiliareqqinneqarnissaat siunertarlugu qajuusaasaliarineqarlutik. Qassutikut katersorneqartunit qajuusaasaliarineqartut silami issiavinnik, Nuummi sumiiffinnut arlalinnut inissititerneqartunik sanaartornermut atorneqarput. Naalakkersuisut isumaat malillugu kommunit inuillu ataasiakkaat plastikkinik immikkoortiterinerni atueqqiisarnernilu misilittagaasa atorluarneqarnissaat pisariaqarpoq.

Nunatsinni aningaasaqarneq avatangiisillu eqqarsaatigalugit, assersuutigalugu sanaartornermi atortunut plastikkinik atueqqittarneq imminut akilersinnaanersoq, Naalakkersuisut ESANI sullissisullu allat suleqatigalugit misissuiffiginiarpaat.

Taamatut oqaaseqarluta Naalakkersuisuniit siunnersuutip akuerineqarnissaa inassutigaarput.